



Iznoseći završnu riječ na suđenju za zločine u Ilijašu, Državno tužilaštvo je zatražilo da Srpko Pustivuk bude osuđen na kaznu zatvora ne manju od deset godina. Tužilaštvo BiH je u završnom izlaganju istaklo kako smatra da Vijeće Suda BiH može donijeti zaključak o krivnji optuženog i to da je optuženi "individualno odgovoran" za zločine za koje se tereti.

"Pravedna i adekvatna kazna je samo zatvorska kazna. Tužilaštvo smatra da Sudsko vijeće treba izreći kaznu ne manju od deset godina i donijeti odluku kojom se Srpku Pustivuku produžava mjera pritvora", kazala je Vesna Ilić, tužiteljica Tužilaštva BiH.

Srpko Pustivuk je optužen da je, kao pripadnik Stanice javne bezbjednosti (SJB) Ilijaš, 29. maja 1992. godine, s drugim pripadnicima vojske i policije Srpske Republike BiH, učestvovao u napadu na civile u selu Gornja Bioča.

U optužnici se navodi da su tom prilikom ubijena dva, a teško ranjena tri civila, od kojih je dvoje bilo maloljetno. Tužilaštvo BiH tereti Pustivuka da je tokom maja i juna 1992. učestvovao i u nezakonitom zatvaranju civila Bošnjaka, koji su potom pritvarani u logore i druge zatočeničke centre.

Tužilaštvo BiH je naglasilo da, imajući u vidu izjave svjedoka koje su saglasne, proizlazi da je optuženi počinio ratni zločin protiv civilnog stanovništva, kao i da su svi svjedoci bili dosljedni govoreći o dešavanjima u kući Selimovića.

"Svjedokinja S3 je kritičnog dana bila u kući Selimovića, te je ranjena kada je počela pucnjava, zajedno s djecom. Kazala je da je u kuću ušao Pustivuk, kojeg je poznavala odranije, nakon čega se čula pucnjava", kazala je tužiteljica Ilić.

Tužilaštvo BiH je u završnom izlaganju istaklo i da smatra neprihvatljivom tezu Odbrane da su nepoznati vojnici počinili napad na civile u kući Selimovića.

"O dešavanjima u kući porodice Selimović govore mještani Bošnjaci, kojima je teško što su to počinili njihove komšije", rekla je Ilić, dodavši da su svjedoci tokom suđenja kazali da u selu nije bilo stranih naoružanih ljudi.

Ilić je istakla i kako su zarobljenici u školi u Gornjoj Bioči bili civili. Tužilaštvo smatra i da su tokom suđenja svjedoci potvrdili identitet optuženog, te su ga mnogi od njih poznavali odranije jer je živio u Gornjoj Bioči.

"Mještani su ga smatrali glavnim u selu, jer su znali da je Srpko Pustivuk bio u specijalnoj policiji. Jedan od svjedoka je kazao kako misli da je sve što se dešavalo rađeno po direktivi optuženog", rekla je Ilić.

Iznošenje završne riječi Odbrane zakazano je za 6. decembar ove godine.